

REGIONAL NEWS

HEADLINES:-

1. Chief Minister Pu Lalduhoma'n Reserved Bank of India Treasury Holdings-a Mizoram sum leh pai dinhmun chinchhiah danin cheng vbch 1379 leh nuai 35 a ni tih a sawi.
2. Aizawl Municipal Corporation (AMC) chuan thupek tichhuak in Aizawl Treasury bazar chu hung ani dawn tih an tarlang.
3. External Affairs minister Dr.S.Jaishankar chuan khawvel ramte inenkawl na tur dan chak leh tha tak neih a ngai tih a sawi
4. Thla 9 chhung International Space Station (ISS)-a an tangkhang hnuah NASA Astronauts Sunita Williams leh Butch Wilmore te chu tukin khan him takin khawvelah an lo let.

<><><>

CM : FINANCE

Chief Minister Pu Lalduhoma'n Reserved Bank of India (RBI) Treasury Holdings-a Mizoram sum leh pai dinhmun chinchhiah danin cheng vbch 1379 leh nuai 35 a ni tih a sawi.

He thu hi nimina Assembly thutkhawma zawhna leh chhanna hunah sawiin Finance changtu Chief Minister Pu Lalduhoma chuan February ni 15, 2025-a chhinchhiah danin Mizoram sum leh pai dinhmun chu cheng vbch 895 nuai 8 ani tih sawiin nimina chhinchhiah danah erawh cheng vbch 1379 leh nuai 35 ani a ti a, nitin report an dawn thin thu sawiin a inthlak danglam thin tih a sawi.

Chief Minister chuan tun dinhmunah sum an dahthat mek chu a thlamuanthlak tih sawiin contract hna kum 3 chhunga la thawk lo chu lapse deposit ah engemaw zat an puang tawh a ti a, Sawrkarin pensioner te hamthatna pek loh mi 82 a nei mek tih sawiin a vaiin cheng nuai 1736 ani a ti a, Pensioner te hamthatna chu sawrkarna an chan hma atanga ba tling khawm ani tih sawiin kumin Financial Year tawp hma in pensioner te hamthatna ba tlingkhawm pek fel vek an tum tih a sawi.

Pu Lalduhoma chuan pensioner te chu anmahni ngeiin Treasury office ah hming ziah a ngaih thin avangin an lak hma chu ba angin a lang thin a ti a, Treasury office a pension hming an dawn chu an pe tlak vek dawn tih a sawi.

Chief Minister chuan inrenchem kum an kalpui na ah ram hruaitute chu hma la hmasatu an ni a ti a, a hlawk thlak hle tih sawiin Year of Consolidation chu a tawp tawh dawn a ti a, inrenchem kum tawp tawh mahse sum inren takin sawrkar kal a la tum reng tih sawiin tun sawrkar kum kal meka sum an puk chu kum tira sum puk tura an ruahman bak pelh an tum lo tih a sawi bawk.

Kumin Financial year kal mekah kum tira leiba tura an inchhut aiin cheng vbch 1003 leh nuai 94 in a tlem a ti a, Budget Revised Estimate atanga lan danin leiba chu cheng vbch sing khat chuang ni mahse sang chuanga a tlem thei chu lawmawm atih thu sawiin sawrkar dangah ala awm ngailo tih a sawi bawk.

<><><>

SAMAGRA

School Education Department Minister, Dr.Vanlalhlana'n ZPM kaihhruai sorkar hnuah advertisement tel lova zirtirtu lak a awm lo a ti.

Education Minister chuan nimina Assembly rorel inkhawma Hrangturzo bialtu MLA, Pu Lalmuanpuia Punte zawhna a chhannaah, ZPM kaihhruai sorkar hnuah advertisement tel lova zirtirtu lak a awm loh thu House a hrilh a, an chhinchhiah danah chuan advertisement kaltlang hian zirtirtu 1507 an la tawh a, MNF kaihhruai sorkar hmasa hnuaiah khan kum 5 chhungin advertisement tel lovin SAMAGRA hnuaiah zirtirtu 600 chuang lak a ni a ti.

Minister chuan Cabinet Meeting-in SAMAGRA Teacher te regularised tura a pass tawh chu Education Department-in a bawh zui nghal a, Mizoram sorkar hnuaia School Education Department, Additional Secretary, Chairman-na hnuaiah a zirchiangtu tur Study Team din in an zir chian mek tih a sawi a. Tun dinhmunah seniority tih fel a la ni lo tih sawiin, kum 2024 September ni 21 khan Provisional Cadre-wise inter se-seniority an tichhuak a, hemi chungchanga representation dawnte chu a tam tham deuh avangin an zir chiang mek tih a sawi a. He scheme in a duh dan ang a hna hrang hranga tling an nih chuan kum 10 service tlingte chu dah ngheh tum an nih thu House a hrilh bawk a ni.

<><><>

AIZAWL TREASURY MARKET

Aizawl Municipal Corporation (AMC) chuan thupek tichhuak in Aizawl Treasury bazar chu hung ani dawn tih an tarlang.

AMC thuchhuah tarlan danin Aizawl Treasury bazar chu a chhehvela Mizoram Legislative Assembly leh hmun pawimawh hrang hrang awmna anih avangin Tuikual South-a AMC Multi-Complex Building ah sawn thlak a ni dawn a, Treasury bazar chu dan kengkawhtute hmalakna tibualo tur leh mipui kal theih lova hung a ni dawn tih sawiin Treasury bazar-a inzuar thu thin te chu AMC Multi Complex lamah sawn thlak vek anni dawn tih an sawi a, thupek chu Mizoram Legislative Assembly himna tur leh mipui himna tur zawka ruahman anih thu an sawi a ni.

Hetihlai hian Aizawl Treasury Bazar Association President Pu HL Chhingpuia chuan Treasury bazar-a eizawngte chu mi harsa tak tak annih avangin an eizawwna tawp mai tur chu an ui thu sawiin chhuahsan an duhloh thu a sawi a, sawrkarin insawwna tura a ruahman Tuikual South-a AMC Multi-Complex Building chu hmun biru anih avangin an eizawwna a chhiat phah vek dawn a ti a, sawrkar chuan an dinhmun hrethiam a, hmalak sak ngei se an duh tih sawiin Aizawl Treasury Bazar-a an thut leh ngei theih nan hma an la zel dawn tih an sawi.

<><><>

DP&AR

Personnel & Administrative Reforms Department changtu Minister Pu K.Sapdanga'n kuminah MCS post ruak 50 zinga 15 hnawhkhah tum a ni a ti.

He thu hi nimina Assembly rorel inkhawma zawhna leh chhanna hunah sawiin, Minister chuan tun dinhmunah MCS junior grade post awm zat 82 zinga 32 chu hnawhkhah tawh niin, post zaa 61, post 50 a ruak mek a, kuminah post 15 hnawhkhah tum a ni a ti.

Minister chuan Special voluntary retirement scheme chu hman theih tawh a nih thu sawiin, kumin January ni 21 khan sorkar chuan Gazette-

ah a chhuah tawh a, sorkar chuan Special voluntary retirement scheme hi hmang turin tumah a ti lui thei lova, mimal hnathawk thei lo ten he scheme hi an dil tur a ni a, DP&AR-in a hriat theih chinah he scheme hnuaiah hian retire an la awm lo tih House a hrilh bawk a ni.

Minister cuan Mizoram Public Service Commission, MPSC tihchak nan kum 2024 khan thawktu 3, Assistant Grade pahnih leh UDC pakhat a lak belh a, kumin 2025 hian Assistant Grade -1, LDC -5, Group D-5, an vaiin 11 lak belh tur te written result nghah mek a nih thu sawiin, MSSSB thiah a nih tak avangin an bungrua zawng zawng chu MPSC-in a hmang chhunzawm a ti.

<><><>

HIV/AIDS AWARENESS

Zirlaite hnena ruihhlo hman sual, mipat hmeichhiatna leh HIV/AIDS chungchang inhrilhhriatna, nimina School Education Department in Aizawl sipai lammuala an buatsaih chu School Education Minister Dr Vanlalhlana hova hman a ni.

He hunah hian Minister Dr Vanlalhlana chuan thusawiin zirlai kalkhawmte chu Mizoram dinhmun tidanglamtu ni tur leh, ruihhlo leh mipat hmeichhiat hman sualna laka inthiar fihlim turin a chah a. Minister chuan infiamnain a ken tel chu mahni inthunna a ni a ti a. Infiamna engemaw berah emaw inhmanga competition hmachhawn thin turin a chah a, chu chuan chhelna leh beih leh zel duhna a neihtir thin a ni a ti.

MSACS Project Director Dr Jane Rinsangi Ralte chuan HIV hi Covid-19 te ang bawkin hripui a ni a, khawvel pum a tibuai a, natna dang angin thawk chak vut vut lo mahse, hlauh a ngai a ni a ti a. Ram pum huap chawhrual aiin Mizoram hi a let 10-in a sang a, thla tin case 200-a pung zel ang a ni a, hei hi mahni in test atang chauhin a ni a ti. Mipat hmeichhiatna avanga kai hi HIV kai zawng zawng atangin zaa 67 an ni a, za zela 30 chu hriau thianghlim lo an ni a, zaa 57 te chuan an that lai hunah an kai tih a sawi bawk. HIV kaite hian dam chhungin damdawi an ei a ngai a, chu chuan taksa peng hrang hrangah nghawng a nei thin a, chuvangin, kai lo tura inven reng a pawimawh a ni a ti bawk. Dr Jane-i chuan mipui nawlpuiah HIV hi a darh mek a ni a ti a. zirlaite chu nunphung hrisel nei turte, zuk leh hmuam, ruihhlo, zu leh mipat hmeichhiatna laka inthiarfihlim turin a chah bawk.

Kalkhawmte chuan Asian Arm Wrestling Cup 2024 Gold Medalist Denic Lalruattluanga kaihhruaiin taksa uluk leh thianghlim taka vawng tur te, ruihhlo hi ram leh hnam hmelma lian ber a nih avanga ti lo turin an intiam a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

EAM

External Affairs minister Dr.S.Jaishankar chuan khawvel ramte inenkawlina tur dan chak leh tha tak neih a ngai tih a sawi. nimna Rasina Dialogue session ah he thu hi sawiin Pu Jaishankar-a chuan khawvel ramte khaikhawmtu dan mumal a awm loh chuan ram thiltithe tlemte chauhin an hlawkpui tih sawiin ram te zawkte tan hlauhthawn tur tam tak a awm thei a ti a. Pakistan-in dan kalha Kashmir a awp bet reng chu sawilangin ramn thuneihna leh mahnin inrelbawl thei anihna zahsak a pawimawh thu a sawi baw a ni.

US Director of National Intelligence Tulsi Gabbard pawhin thu sawiin Prime Minister Narendra Modia chungah lawmthu a sawi a. India-a a cham chhungin inbiakna hlawk tak tak leh pawimawh tak tak a nei thei chu lawmawm a tih thu a sawi a ni.

<><><>

EC

Election Commission chuan Voter ID leh Aadhaar thlunzawm chungchanga ngaihtuaha inrawnkhawmna technical consultation a nei thuai dawn. He inrawnkhawmnaah hian UIDAI leh Election Commission mithiamte an tel dawn a ni. Chief Election Commissioner Gyanesh Kumar-a hova Union Home Ministry, Legislative Department -a Secretary te leh UIDAI a CEO te thukhawm chuan Voter ID leh Aadhaar thlunzawm chungchanga hian thutlukna an siam a. Election Commission chuan thuchhuah siamin Article 326, Representation of the People Act 1950 leh Supreme Court thurel behchhanin hmalak anih tur thu a sawi a ni. Article 326 na in a sawi dan chuan khua leh tuite chauhin vote thlak theihna an neih laiin Aadhaar erawh chu mihring nihna tichiangtu tur chauh anih thu tarlan a ni.

<><><>

NASA

Thla 9 chhung International Space Station (ISS)-a an tangkhang hnuah NASA Astronauts Sunita Williams leh Butch Wilmore te chu tukin khan him takin leiah an lo let. Sunita Williams leh Butch Wilmore te hi SpaceX Crew Dragon Spacecraft hmangin phurh haw an ni a, Gulf of Mexico ah SpaceX capsule parachute hmangin an lo tum a ni. Wilmore leh Williams te hi nikum June thla atang khan ISS ah hian an awm tawh a. An thlawhchhuahna Boeing Starliner spacecraft chu a khawlah thil fel lo a awm avangin khawvela thlawh let leh nan a him loh avangin thla 9 an cham phah a. Vansangah ni 286 awmin an awm hun tur zata ruahman chu ni 278 in an pel a ni.

<><><>